



新撰 漢書地理志彙釋

ル 5  
133  
3





呂  
133  
3

新輯注地理志卷第五

嘉定錢坫著 山淵北對集書 大興徐松集釋

汝南郡高帝置

高帝四年置

閻氏若璩曰汝南郡先書平輿縣却不為治治上蔡縣以翟方進傳知之其傳首敘次與賈誼傳正同也元和志謂治平輿者非水經注云上蔡縣漢高祖四年置汝南郡又於平輿縣云東漢汝南郡治是元和志所言誤以東漢為西漢也

莽曰汝汾分爲賞都尉屬豫州戶四十六萬一千五百八

十七口二百五十九萬六千一百四十八縣三十七

齊氏召南曰汾當作墳尉當作郡言莽改汝南郡曰汝墳郡又分置賞都郡耳松按三國志陳羣傳注引漢書地理志汝南爲上郡有三十餘萬戶與今本異或字之訛

平輿

在今汝甯府城東北汝水之南通典故城在汝陽縣東後漢書注在縣東北元和郡縣志東北六十里應邵曰故沈子國今沈亭郡國志云姬姓史記管蔡世家武王封弟季載于冉春秋傳作邨唐書宰相世系表廣韻並云文王弟十子聃季食采于沈卽汝南平輿沈亭字亦爲邨按古聃字從冉聃字從允聃同字沈字亦從允故亦得與邨字通也是沈卽季載之國矣地志家皆未言此

陽安

在今汝甯府確山縣北後漢書注故城在朗山縣東北應邵曰道國也今道亭杜預曰在縣南元和郡縣志故

道城在朗山縣東北二十里按今陽安在確山安陽在息縣二地志家多亂

陽城

在今陳州府商水縣西相承舊云後漢并入汝陽後漢之汝陽今商水縣也松按陳勝陽城人是秦有此縣

侯國

宣帝元康四年封劉德

莽曰新安

潏強

水經潏水東南過臨潏縣南又過潏強縣北又過西華縣北臨潏今臨潏縣西華今西華縣則縣當在陳州府

西華縣西南潁水南矣水經注潁水出陽城縣少室山東流注于潁水而亂流東南逕臨潁縣西北小潁水出焉小潁水注大潁水東入于潁據之則此縣小潁水所逕也大潁水即爾雅汝有潰之潰潰潁聲相近說文解字亦云汝為涓涓潁亦聲相近也今大潁水即南汝水之原耳潁說文解字作潁

富波

在今汝甯府新蔡縣北水經注銅陂東注為富水風俗通水經注並作富陂

女陽

今商水縣地水經注潁水東逕西華縣南又逕女陽縣

北注于潁女陽女陰並作女者闕駟曰汝水別流其後杜渴號曰死汝故其字無水

銅陽

在今新蔡縣東北通典後漢書注並云在新蔡縣東北應邵曰在銅水之陽水經注潁水左迤為葛陂葛陂東出為銅水水逕銅陽縣南今潁水在府城之南俗曰栗

洲葛陂在府城東南也

段氏玉裁曰左傳襄二  
年釋文銅陽孟康音紂直九反一音童

或音直勇反非松按王氏念孫錢氏大昕皆以銅當音紂紅反其但音紂者脫去紅反二字也王氏引之則云孟康但音銅為紂並無紅反二字故玉篇祇有直久而無紂紅也廣韻東韻徒紅反二字故玉篇祇有直久而無紂紅也廣韻東韻徒紅反二字故玉篇祇有直久而無紂紅也廣韻東韻徒紅反二字故玉篇祇有直久而無紂紅也

吳房

今汝甯府遂平縣後漢書注今豫州縣也史記項羽本紀作吳防孟康曰本房子國楚靈王遷房于楚吳王闔閭弟夫槩王奔楚封于此爲堂谿氏以封吳故曰吳房今吳房城棠谿亭是太平寰宇記堂谿故城在遂平縣西南四十里

安成

在今汝甯府城東南七十里汝水之北通典故城在矣房縣東南後漢書注在汝陽縣東南太平寰宇記在汝陽縣東括地志汝陽縣東南七十一里

侯國

元帝建始元年封王崇

莽曰至成

南頓

在今陳州府項城縣北五十里後漢書注故城在項城縣西應邵曰頓迫于陳其後南徙故號南頓

故頓子國姬姓

朗陵

在今確山縣西南三十五里後漢書注故城在朗山縣西南元和郡縣志西南三十五里應邵曰朗陵山在西南今山在確山縣南四十里

細陽

在今潁州府城西北四十里後漢書注故城在汝陰縣

西北太平寰宇記西北四十里後漢于此分征羌縣范滂傳云汝南征羌人謝承書云細陽人依義應作涵說文解字涵水出新鄴入潁

莽曰樂慶

宜春

在今汝甯府城西南通典後漢書注並云故城在汝陽縣西南括地志西六十七里北宜春也水經注豫章有宜春故加北矣

侯國

昭帝元鳳四年封王訢

莽曰宣孱

文陰

今潁州府城後漢書注今汝陰縣也

故胡子國

在今潁州府城西北二里太平寰宇記胡城在汝陰縣

西北三里按鄭武公所伐之胡括地志以為在鄆城縣

界鄆城與鄭尚近若在潁州則太遠矣疑二胡兩異

都尉治莽曰汝墳

新蔡

今汝甯府新蔡縣

蔡平侯自蔡徙此後二世徙下蔡

吳遷昭侯于州來即下蔡也宋忠謂平侯徙下蔡者非

莽曰新遷

服虔讀遷為僊

新息

在今光州息縣北三十里後漢書注故城在新息縣西南元和郡縣志西南十里孟康應邵並云故息國其後東徙故加新云說文解字作郟云姬姓國在淮北今汝南新息水經注故息城在西春秋傳鄭息有違言息侯伐鄭杜預以為即此新息余攷新息與鄭南北相去五百里越國遠征息小國也未必能如此知伐鄭之息是故息矣水經注汝水出梁縣勉鄉天息山今汝州地在鄭之西疑未遷之息是其處焉

莽曰新德

濯陽

在今遂平縣西後漢書注今吳房縣也水經濯水出吳房縣西北與山東入汝注濯水入瀾瀾水入汝今奧山在遂平縣西六十八里地形志云二漢為瀘陽後改瞿陽州郡志作瞿陽瀘別字瞿通字也

期思

在今光州固始縣西北七十里後漢書注故城在固始縣西北太平寰宇記西北七十里

慎陽

在今汝甯府真陽縣北四十里太平寰宇記真陽漢慎

陽縣地應邵曰慎水出東北入淮水經注慎水東流積  
爲焦陂陂水東南流爲上慎陂又東爲中慎陂又東南  
爲下慎陂皆與鴻却陂水散流其陂首受淮川左結鴻  
陂漢成帝時翟方進奏毀之今鴻却陂在府城東十里  
慎水在南六十里闞駟曰字本作慎永平五年失印更  
刻遂誤以水爲心如溘讀慎爲震

慎

在今潁州府潁上縣西北通典後漢書注太平寰宇記  
並云故城在潁上縣西北

莽曰慎治

召陵

在今許州鄆城縣東三十五里後漢書注故城在鄆城  
縣東史記正義東四十里元和郡縣志四十五里說文  
解字作邵闞駟曰邵者高也其地邱墟井深數丈故以  
名焉攷邵訓爲高其字從巴作邵與從邑之字不同蓋  
借其義耳

弋陽

在今光州西十三里括地志在定城縣西十里應邵曰  
弋山在西北故黃國今黃城今弋山一名浮光山在光  
山縣北八十里黃國在定城廢縣西十二里元和郡縣  
志黃國故城在定城縣西十二里

侯國



昭帝元鳳二年封任宮

西平

在今汝甯府西平縣北四十五里通典後漢書注並云在郾城縣南後漢書注又云在吳房縣西北太平寰宇記在西平縣西七十里應邵曰故栢子國今栢亭所謂江黃道栢者是也

有鐵官

水經注晉太康地記曰縣有龍泉水可以砥礪刀劍特堅利史記蘇秦傳韓卒之劍戟出于合鄆戰國策作合伯合伯即栢國也故置鐵官古伯栢字通用

莽曰新亭

上蔡

今汝甯府上蔡縣

松按段云在今縣西南十里

太平寰宇記漢縣迄

今不改沛郡有下蔡此云上

故蔡國周武王弟叔度所封度放成王封其子胡十八世

徙新蔡

蔡平侯也宋忠以為胡徙新蔡者非

濳

今光州固始縣通典太平寰宇記並云固始縣也應邵曰孫叔敖子所邑之濳邱世祖更名固始攷世祖建武三年司空李通慕叔敖受邑故嘉之以改名也

莽曰閭治

西華

今西華縣後漢書注故城在澗水縣西北澗水即灑水也

莽曰華望

長平

在今西華縣東北十八里後漢書注故城在宛邱縣西北括地志西六十六里

莽曰長正

宜祿

今項城縣地太平寰宇記故城在項城縣

莽曰賞都亭

莽以子臨為賞都侯當即其地

項故國

今項城縣後漢書注今項城縣也

新鄴

在今潁州府城西北八里後漢書注故城今汝陰縣西北鄴邱城是也應邵曰秦伐魏取鄴邱漢興為新鄴按

新鄴非魏地史記秦伐魏當是邢邱耳

莽曰新延

歸德

侯國宣帝置

宣帝地節四年封先賢禪

莽曰歸惠

新陽

水經潁水東過南頓縣北又過新陽縣北注細水東逕新陽縣北又東南逕宋縣北南頓今項城地宋卽新鄴在潁州府城西北則此新陽在今項城縣東爲潁州府太和縣南地矣水經注又云新溝水北逕新陽縣南散流入細今無水是縣在新水之陽也通典後漢書注括地志並云在眞陽縣西南則今信陽州矣非是表有陽信侯呂青史記作新陽新信古字通

莽曰新明

安昌

在今汝甯府信陽州西七十里太平寰宇記朗山縣卽漢安昌縣

侯國

成帝河平四年封張禹

莽曰始成

安陽

在今息縣西南十里後漢書注故城在新息縣西南括地志西南八十里應邵曰故江國今江亭羸姓

侯國

成帝鴻嘉元年封王音

莽曰均夏

博陽

在今陳州府城西南四十里太平寰宇記在宛邱縣西南四十里

侯國

宣帝元康三年封邴吉表屬南頓應是分南頓縣置南頓之北即今陳州府城之南也水經注城在南頓縣北四十里

莽曰樂嘉

松按俗本作樂家錢據水經注三國志晉書改之段校同

成陽

在今信陽州東北淮水之北水經注淮水逕成陽縣故

城南又東逕安陽縣故城南

侯國

成帝永始四年封趙臨表在新息應是分新息縣置

莽曰新利

定陵

在今鄆城縣西北六十里通典後漢書注並云故城在鄆城縣西北太平寰宇記西北六十里水經泄水過潁川定陵縣西北又云汝水東南過定陵縣北皆指潁川之定陵也惟志潁川汝南有兩定陵郡國志潁川有定陵汝南郡無蓋一省并也此定陵在汝水之北潁川定陵在汝水之南地雖近而不同

高陵山汝水出東南至新蔡入淮

水經汝水出梁縣勉鄉西天息山東南過郟縣南定陵縣北郟縣北上蔡縣西平輿縣南至原鹿縣入淮今水出嵩縣南伏牛山即天息山也東北流百餘里逕伊陽縣南折東南流逕汝州南寶豐縣北郟縣南襄城縣西南舞陽縣東北郟城縣南而與澧水會而東出至商水縣下流曰沙河自元時塌斷故汝令東歸沙潁而汝水自故郟縣至上蔡之流遂絕故今咸以出天息之水為北汝矣南汝自泌陽縣北山出而東流逕遂平縣南上蔡縣南汝甯府城東北至新蔡縣東南下流入于淮南汝之原與水經不侔而自上蔡以下則故流也但天息

山與定陵東西相去數百里汝水不應原出定陵故說者以天息之原畫水經之水定陵之原畫漢志之水疑莫能定焉說文解字汝水出宏農盧氏還歸山即天息山也此北汝之原淮南子汝出猛山注猛山一名高陵山此南汝之原王氏念孫曰汝水下脫所字過郡四行千三百四十里

北汝過宏農河南潁川汝南四郡南汝過南陽汝南二郡王氏念孫曰此處脫莽曰定城四字水經汝水注曰汝水又東南逕定陵縣故城北王莽更之曰定城是其證

南陽郡秦置

昭襄王二年置劉熙曰在中國之南而居陽地故以為

名張衡南都賦倍京之南居漢之陽

莽曰前隊屬荊州戶三十五萬九千三百一十六口一百九十四萬二千五十一縣三十六

宛

今南陽府城後漢書注故城今南陽縣也閻氏若璩曰南陽治於宛

以地理志翟方進及王莽傳知之又按高帝紀南陽守蒯越敗于犍東走保城守宛是秦時已治宛

故申伯國有屈申城縣南有北筮山

在今南陽府城東南水經注清水之南有南就聚郡國志所謂宛縣有南就聚者也郭仲產言宛城南三十里有一城甚卑小相承名三公城余按清水左右舊有二筮所謂南筮北筮者水側之瀆聚在清陽之東北考古

推地則近矣王氏念孫曰宛縣故城為今南陽府治其地無北筮山山當為聚下文育陽有南筮

聚則此當為北筮聚明矣

戶四萬七千五百四十七有工官鐵官莽曰南陽

犍

在今汝州魯山縣東南五十里通典後漢書注並云故

城在魯山縣東南松按犍有博望鄉為何武汜鄉族國按汜鄉在琅邪不其二處地不相接

杜衍

在今南陽府城西南十里括地志故城在南陽縣西八

里後漢書注在南陽縣西南太平寰宇記西南十三里

莽曰閔衍

鄴

在今襄陽府光化縣東北漢水上通典後漢書注太平寰宇記並云故城在穀城縣東北

侯國

武帝元狩三年封蕭何曾孫慶錢氏大昕曰蕭何初封本是沛郡之鄜其後嗣

乃封南陽之鄧師古以此鄧為蕭何所封殊未了

莽曰南庚

育陽

在今南陽府城南後漢書注太平寰宇記並云在南陽

縣南

有南筮聚在東北

博山

在今南陽府內鄉縣西南一百三十里今日順陽保也

通典後漢書注並云故城在穰縣西括地志西十三里

太平寰宇記在縣西北

侯國哀帝置故順陽

綏和二年封孔光表屬順陽則縣本名順陽也應邵曰

明帝改曰順陽明帝復舊名耳水經注云今于是縣無

聞順水矣

段氏玉裁曰應劭之說蓋謂哀帝以前名順陽哀帝更為博山至明帝又復為順陽也郡

國志曰順陽故博山此可證矣此如湖陸莽曰湖陸先

湟陽

在今南陽府鄧州東六十里應邵曰在湟水之陽水經

注水出涅陽縣西北岐棘山東逕涅陽縣故城西東南流注湍水

莽曰前亭

陰

在今襄陽府穀城縣東北曰陰城鎮也通典穀城有陰縣城在北後漢書注故城在穀城縣北春秋之下陰也

堵陽

在今南陽府裕州東六里後漢書注故城在方城縣韋昭讀堵為赭元和郡縣志堵水西去方城縣三十五里

莽曰陽城

雉

在今南陽府城北八十里

衡山

在今南陽府城北七十五里後漢書注在向城縣北澧水所出東至鄆入汝

本作東至鄆者誤水經注醴水出雉縣衡山東南逕唐城北北南入城而出城西流又東南逕葉縣北鄆縣南左入汝今澧水出裕州北境山東流逕葉縣南舞陽縣北至鄆城縣北入汝古字澧醴同

山都

在今襄陽府城西北通典故城在義清縣東南後漢書注舊南陽之赤鄉秦以為縣故城在義清縣東北太平



寰宇記在中廬縣東北

蔡陽

在今襄陽府棗陽縣西南後漢書注故城在棗陽縣西

南應邵曰蔡水出東入淮

莽之母功顯君邑

新野

今南陽府新野縣後漢書注今鄧州縣也

筑陽

在今穀成縣西北五里後漢書注故城在穀城縣西元

和郡縣志今縣北十五里故穀城漢筑陽縣也水經沔

水東南過鄧縣西南又南過穀城東陰縣西筑陽縣東

又東過山都縣東北應邵曰筑水出房陵東入沔今筑

水出房縣東北流在穀城縣東南入漢

故穀伯國

今穀城縣城是

莽曰宜禾

棘陽

在今新野縣東北七十里後漢書注故城在湖陽縣西

北應邵曰在棘水之陽

武當

今襄陽府均州後漢書注今均州縣也武當山在縣南

八十里今山在州南百二十里

舞陰

在今南陽府泌陽縣西北六十里

松按段云在縣北十里

通典故

城在泌陽縣西北元和郡縣志西北六十五里山海經朝歌之山澠水出焉水經澠水出澠陰縣西北扶子山今扶子山在縣西北七十里水經注朝歌扶子山之異名也澠舞古字通

中陰山澠水所出東至蔡入汝

水經澠水出澠陰縣東上界山東過吳房縣南濯陽縣南上蔡縣南東入汝注山海經謂之視水也郭景純曰視宜為澠出葦山許春日出中陽山皆殊目也今水出泌陽縣東北功臣表澠作親

段氏玉裁曰水經注引作中陽山澠水所出東至上

蔡入汝王氏念孫曰蔡上脫上字今澠水東北過上蔡縣界又東南過汝陽縣入汝漢上蔡故城在今上蔡縣西

西鄂

在今裕州南後漢書注故城在向城縣南括地志元和郡縣志並云在南二十里今向城廢縣在府城東四十里也應邵曰江夏有鄂故加西

穰

在今鄧州南二里括地志鄧州所理後漢書注今鄧州縣也說文解字作鄴郭仲產南雍記曰穰楚別邑

莽曰農穰

酈

在今內鄉縣東括地志故城在新野縣西北三十里郭仲產曰故城在攻離山東南三蒼云樊鄧鄠卽此如涪蘇林讀躡躡之躡鄒誕生音厯

育水出西北南入漢

卽宏農盧氏之水也

安衆

在今南陽府城西南三十里名安衆鋪後漢書注故城在南陽縣西南仍有其名無復基址

侯國

武帝元光四年封長沙定王子丹

故宛西鄉

冠軍

在今鄧州西北四十里元和郡縣志故城在臨滄縣南四十里太平寰宇記在南陽縣西四十五里

武帝置

武帝元朔六年封霍去病置也

故穰盧陽鄉宛臨駝聚

說文解字穰縣有鄴鄉當卽此古字鄴盧聲轉

比陽

在今南陽府唐縣東應邵曰比水所出東入蔡水經比水出比陽東北大胡山西至新野縣南入于涪

段氏玉裁曰比水與盧江郡濶縣之泚水異光武紀與甄阜梁賜戰於比水西章懷注作泚水泚陽縣唐加旁也松按大復

山出泉西流者為醴東流者為淮醴水西流逕平氏故城東北又西至唐縣界而入泚水蓋即比陽所在也又按趙東潛據誤本水經注謂此志比陽當作泚陽王氏念孫曰隸釋載郭仲奇碑云舉廉比陽長又吉成侯州輔碑陰有比陽張超後漢書晉宋後魏志皆作比陽比水或謂之泚水唐置泌陽縣比泚一聲之轉

平氏

在今唐縣東南七十里後漢書注故城今唐州縣也錢氏

大昕曰五嶽四瀆之祠皆載於志平氏有淮水祠獨失書恐傳寫有脫誤

禹貢桐柏大復山在東南

山在今南陽府桐柏縣西南三十里括地志在唐縣東南五十里元和郡縣志在桐柏縣西南九十里史記正義在唐州東三十餘里

淮水所出東南至淮浦入海

舊本作淮陵誤也依水經改之云淮水出平氏縣胎簪

山東北過桐柏山東過平春縣北新息縣南期思縣北

原鹿縣南安豐縣東北壽春縣西北當塗縣北鍾離縣

北淮陰縣西北至淮浦縣入于海今出桐柏山東南流

逕縣城東信陽州北真陽縣南羅山縣北息縣南光州

北固始縣北潁州府城南霍邱縣北潁上縣南壽州西

北懷遠縣南鳳陽府城北臨淮縣北五河縣南盱眙縣

北入洪澤湖逕桃源縣南出清口會黃河逕清河縣南

淮安府城東安東縣南東北至雲梯關入于海段氏玉

自平氏至入海大致東北行東多北入班志說文俱作東南南字誤松按隸釋載延熹六年桐柏淮源廟碑淮出平氏始於大復潛行地中見于陽口立廟桐柏

過郡四行三千二百四十里青州川

過南陽江夏汝南廬江九江臨淮六郡四字疑誤松按禹貢

雖指引易氏曰淮自桐柏至海通計一千八百里金吉甫又謂凡一千七百里漢志三千字謬段氏數過郡有

下邳廣陵

莽曰平善

隨故國

今德安府隨州括地志隨州外城故隨國地後漢書注

故城今隨縣

厲鄉故厲國也

今隨州北百八十里有厲山太平寰宇記厲山在隨縣

北一百里

葉

在今南陽府葉縣南三十里括地志後漢書注並云今

葉縣也

楚葉公邑

皇覽縣西北去城三里有葉公諸梁冢近縣祠之曰葉

君邱

有長城號曰方城

在今葉縣南四十里史記正義山在葉縣西南十八里

元和郡縣志東北五十里志或誤也韋昭曰方城楚北

之阨塞

王氏念孫曰史記索隱引地理志葉縣南有長城號曰方城則此有上脫南字

鄧

在今襄陽府城東北二十里括地志故城在安養縣北二十里元和郡縣志在臨漢縣東北二十二里故國

楚文王滅之秦以為縣

都尉治

松按翟方進傳翟義收縛宛令劉立傳送鄧獄蓋義以南陽都尉行太守事都尉治於鄧故送鄧也

朝陽

在今鄧州南八十里俗稱之曰刁城通典故城在穰縣東南後漢書注在南括地志南八十里應邵曰在朝水之陽按今有刁水在鄧州西原出內鄉縣南逕州城南入湍水者即朝水也然則縣故城不得在穰東南矣後

漢書注是

莽曰厲信

魯陽

今汝州魯山縣括地志魯山本漢魯陽縣也

有魯山古魯縣御龍氏所遷

山在今魯山縣東十八里春秋傳劉累遷于魯縣御龍

氏也

堯山

山在今魯山縣西舊本亦作魯山從說文解字改之張

衡賦曰立唐祀于堯山劉累堯後也故立唐祀名山曰

堯松按王校同王氏念孫又曰魯山在縣東堯山在縣西

湟水所出東北至定陵入汝

水經湟水出魯陽縣西堯山東北過定陵縣西鄆縣南東入于汝今水由魯山縣南逕保豐縣南葉縣北至鄆城縣西入汝今日沙河也春秋傳作泝水

又有昆水東南至定陵入汝

水經注昆水出魯陽縣唐山東南流逕昆陽縣故城西又東逕定陵城南注汝水今昆水于葉縣北昆陽關入沙河今葉縣城即昆陽城也

莽曰魯山

本無此四字從水經注加之

松按段校同  
王校亦同

春陵

在今襄陽府棗陽縣南三十里後漢書注故城在棗陽縣東元和郡縣志東南三十五里

侯國

長沙定王孫仁所徙國也漢紀武帝元朔五年以零陵冷道之春陵鄉封長沙定王子買為侯至孝侯仁以地形下溼上書徙南陽元帝許之以蔡陽白水鄉徙仁為春陵侯

故蔡陽白水鄉上唐鄉故唐國

上唐在今棗陽縣東北後漢書注鄉在棗陽縣東北一百五十里有故城

新都

在今新野縣東郡國志新野有東鄉故新都

侯國

元帝元始四年封王莽

莽曰新林

湖陽

在今唐縣南八十里後漢書注今唐州縣也

故廖國也

春秋傳作颺太康地記蓼國先在南陽廖颺蓼三字通用高帝本紀作胡陽湖胡亦同

紅陽

侯國

元帝元始四年封王立

莽曰紅俞

樂成

在今鄧州西南三十里

侯國

宣帝元康二年封許延壽表屬平氏應是分平氏縣置博望  
在今南陽府城東北七十里郭仲產曰在郡東北百二十里本犍縣鄉也是其地在今裕州之西北南召縣之東南適當府城東北矣括地志元和郡縣志並云在向城縣東南四十五里似非當在向城廢縣之西北耳



侯國

宣帝元康二年封許舜

莽曰宜樂

復陽

在今桐柏縣西南二十里應邵曰在桐柏大復山之陽也

侯國

宣帝元康元年封長沙頃王子延年

故湖陽樂鄉

南郡秦置

昭襄王二十九年置

松按楚相孫叔敖碑云楚都南郢南郢即南郡江陵縣也

高帝元年更爲臨江國

共敖國

錢氏大昕曰高帝元年楚柱國共敖爲臨江王都江陵即南郡故地也本項羽所封史家繫之

高帝耳其五年敖子尉爲漢所虜則復爲南郡矣

五年復故

虜尉國除

景帝二年復爲臨江

子哀王闕國

中二年復故

王表哀王闕二年三月立三年薨亡後愍王榮七年十

月立三年自殺闕榮並景帝子立又異時是闕國在

先榮國在後也志統舉之

莽曰南順屬荊州戶十二萬五千五百七十九口七十一萬八千五百四十有發弩官縣十八

江陵

今荊州府城太平寰宇記荊州縣也共敖都閻氏若璩曰南郡治

江陵以郊祀志知之又曰秦時亦治江陵

故楚郢都楚武王自丹陽徙此

史記楚文王徙都郢孔穎達春秋傳正義引本書亦作楚文王世本作楚武王云地里志依史記為說是此應作文王也疑為後人所改說文解字郢故楚都在南郡江陵北十里水經注江水逕江陵城南故楚也又逕郢城南子囊遺言所築也地里志楚別邑故郢矣通典江

陵縣界有故郢城又有紀南城括地志紀南城在江陵縣北五十里郢城在江陵縣東北六里亦承水經注而言獨于平王城之義不合春秋傳昭公二十三年楚囊瓦城郢即子囊遺言所築耳而不言是別邑此于別邑郢下又不言平王所城是酈氏之分未為是矣

後九世平王城之

在平王十一年

後十世秦拔我郢徙陳

頃襄王二十一年也孟康曰舊以江陵為南楚陳為東楚彭城為西楚文穎曰史記貨殖傳淮以北沛陳汝南南郡為西楚彭城以東東海吳廣陵為東楚衡山九江

江南豫章長沙爲南楚又曰彭城東楚項羽謂之西楚

莽曰江陸

臨沮

在今荊州府遠安縣西北括地志荆山縣本漢臨沮縣地通典故城在當陽縣北後漢書注在西北

禹貢南條荆山在東北

山在今襄陽府南漳縣西八十里括地志在荆山縣西八十里元和郡縣志在南漳縣西北八十里

漳水所出東至江陵入陽水陽水入沔行六百里

水經注陽水上承江陵縣赤湖北注于沔又云漳水于當陽縣東南右會沮水以此爲非也今漳水出南漳縣

南逕遠安當陽二縣會沮水至荊州府城西入江楚昭

王曰江漢睢漳楚之望也段氏玉裁曰陽水卽沮水鄭氏曰今漳水於當陽縣之東

南百里餘而右會沮水也

夷陵

在今宜昌府城西北括地志今峽州縣也通典後漢書

注太平寰宇記並云故地在夷陵縣西北應邵曰夷山

在西北

都尉治莽曰居利

華容

在今荊州府城東南後漢書注故城在荊州東也

雲夢澤在南荊州藪

按志說是以今洞庭湖爲雲夢矣春秋傳所謂江南之夢也在今岳州府城西南鄒誕生讀夢爲蒙司馬相如賦云方九百里

夏水首受江東入沔行五百里

水經夏水出江津于江陵縣東南又東過華容縣南至雲杜縣入于沔今漢陽府沔陽州南有長夏水卽夏水也自監利縣流逕州南四十里東北入漢馬融鄭康成皆以爲滄浪之水非也滄浪水在今均州北四十里

宜城

在今襄陽府宜城縣南十里後漢書注故城在牽道縣南元和郡縣志在宜城縣南九里

故鄢惠帝三年更名

括地志故鄢城在安養縣北三里

鄢楚別邑故鄢

春秋傳次于郊鄢疑卽此也今安陸府鍾祥縣地

莽曰鄢亭

鄢

在今宜城縣東北後漢書注故城在今襄州孟康音忌

周成雜字解詁音忌

當陽

今安陸府當陽縣水經注城因岡爲阻北枕沮水春秋傳楚伐麋潁容曰麋當陽也今縣北百里有當陽阪

中廬

在今宣城縣東北五十里通典襄陽漢中廬縣也後漢書注故城在襄陽縣南括地志元和郡縣志並云在義清縣北二十里春秋時廬戎國也郡國志作廬

枝江

今荊州府枝江縣太平寰宇記今荊州縣也水經注縣北據大江江汜枝分故以枝江為稱

故羅國江沱出西南東入江

水經荊州沱水在南郡枝江縣注江水逕上明城北江汜枝分東入大江今枝江縣東北六十里百里洲是也上明城在縣東北松滋縣界舊本無南字從水經注加

襄陽

段氏玉裁曰水經注引江沱出西南東入江今本無南字松按羅既徙於今湘陰故此為故羅

今襄陽府城太平寰宇記襄州縣也後漢書注在棗陽縣東北疑非應邵曰在襄水之陽今水在府城西北原出柳子山北流者為檀谿南流者曰襄水也荊州記襄陽舊楚之北津從襄陽度江逕南陽出方關是周鄭晉衛之道其東津逕江夏平澤關是陳蔡齊魯之道

莽曰相陽

編

水經注漳水屈西南逕編縣南縣舊城之東北百四十里也南逕臨沮縣之章鄉南依義則今遠安縣東北地

有雲夢官

今在江南自枝江縣而東為松滋公安石首在江北自  
荊州府而東為監利沔陽漢水以西南為潛江東北為  
鍾祥京山天門雲夢孝感羣水豬焉皆曰古雲夢也故  
編西陵並置雲夢官

莽曰南順

秭歸

今宜昌府歸州孟康讀秭為姊袁山松曰屈原有賢姊  
聞原放逐亦來歸喻令自寬全鄉人冀其見從因名曰  
姊歸宜都記蓋楚子熊繹之始國而屈原之鄉里也荆  
州記縣北百里有屈原故宅今其地名樂平宅水經注

縣北百六十里有屈原故宅宅之東北有女須廟然歸  
古國名未必因屈原而氏縣也

歸鄉故歸子國

在今歸州東二十里通典在歸州東二十里元和郡縣  
志在秭歸縣東二十里按古歸夔字通用歸即夔耳樂  
緯昔歸典叶聲律后夔也服虔曰夔在巫山之陽

夷道

在今荊州府宜都縣東後漢書注故城在宜都縣西通  
典太平寰宇記並云在縣東水經注漢武帝伐西南夷  
路由此出故名按縣有蠻夷曰道說未是也應邵曰夷  
水出巫東入江水經江水過魚復縣南夷水出焉又東

南過夷道縣北夷水從佷山縣南東北注之今日清江  
也由宜都縣西北會施南府都諸水入江

莽曰江南

州陵

在今武昌府城西南水經注長洋港東北逕石子岡岡  
上有故城卽州陵之故城也莊辛所言左州侯國矣又  
東逕州陵新治南

莽曰江夏

若

在今宜城縣西括地志故城在樂鄉縣東北三十三里  
元和郡縣志在縣北三十七里春秋傳作都古字通用

楚昭王畏吳自郢徙此

昭王十二年也

後復還郢

巫

在今夔州府巫山縣北史記正義今巫山縣也後漢書  
注故城在巫山縣北應邵曰巫山在西南今山在縣北  
也蘇秦云楚西有巫郡水經注秦省郡立縣以隸南郡  
段氏玉裁曰水經注引郭仲產云按地理志巫山在縣  
西南而今縣東有巫山將郡邑居治無恒故也玉裁按  
今過縣治而東巫峽最  
為高大一如仲產所說

夷水東至夷道入江

今日清江水出施南府利川縣西北山東南流折而東

逕利川縣北施南府城北又東流逕鶴峯州北長樂縣

北長陽縣南至宜都縣西北入于江胡氏渭曰夷水首出魚復江尾入宜

都江卽荆州之沱也古時自巴入楚避三峽之險皆由

此路蓋大江出三峽逕弱關江沱出很山逕捍關劃然

兩道至建武中伐公孫述皆取道三峽不由夷水可知

其時已淺隘逮唐初建始之北遂成斷港所言甚有依

據然以此志不言首受江爲班氏踈略亦吹毛索瘢矣

洪氏亮吉日班志不能於巫縣以上更詳夷水之源水

經又不克于魚復以西著彼分流之始皆緣漢時思南

等府尚陷武陵蠻中是以不能從流溯源故各從所見

言之亦其憤也

過郡二行五百四十里

過巴南二郡洪氏亮吉日巫夷道皆在南郡而云郡二

始入夷道界耳松按巫縣東逕武陵郡很山等縣

有監官

高成

今荆州府松滋縣通典太平寰宇記並云松滋漢高成

縣也松按說文作高城又接段氏說高成在江北

澧山澧水所出東入繇

水經注澧水出高城縣澧山東至孱陵入油水

繇水東至華容入江

水經作油水云出孱陵縣西界東北入江注孱陵縣白

石山油水所出今水由公安縣東北流入江也古字油

繇同段氏玉裁曰繇油同音而絕不相涉繇在江北而

而北入孱陵在江南也水經注誤

過郡二行五百里



過武陵南郡也

莽日言程

新刊注地里志卷第五終

新刊注地里志卷第六

嘉定錢坫著

大興徐松集釋

江夏郡高帝置

高帝六年置

屬荊州戶五萬六千八百四十四口二十一萬九千二百一十八縣十四

西陵

在今黃州府城西二里括地志元和郡縣志並云故城在黃岡縣西二里

有雲夢官莽日江陽

竟陵

在今安陸府城東南通典後漢書注並云故城在長壽  
縣南史記正義在長壽縣南百五十里國策補正在長  
壽縣東太平寰宇記在長壽縣西四十步據之則今天  
門縣是矣寰宇記之說似非

章山在東北古文以爲內方山

山在今安陸府荊門州南一百八十里括地志在長林  
縣東北六十里史記索隱在竟陵縣東北

郢鄉楚郢公邑

今德安府城卽郢也

莽曰守平

西陽

在今光州光山縣西二十里太平寰宇記今光山縣也

襄

莽曰襄非

邾

在今黃州府城西北一百二十里通典後漢書注太平  
寰宇記並云故城在竟陵縣東括地志元和郡縣志並  
云在黃岡縣東南一百二十里文穎讀邾爲朱太康地  
記楚滅邾遷其人于江南因名縣晉書陶侃傳武昌北  
岸有邾城

衡山王吳芮都

軼

在今光州光山縣西元和郡縣志故城在仙居縣北四  
十里孟康讀軼為沃

故弦子國

通典仙居縣有弦亭晉書地道記以為國在西陽也

鄂

在今武昌府城西南二里世本熊渠封其仲子紅為鄂  
王九州志今武昌括地志武昌縣鄂王舊都今鄂王神  
即熊渠子之神也太康地記以為東鄂矣

安陸

今德安府城後漢書注今安州縣也

閻氏若璩曰元和郡縣志云故漢所

理江夏郡前書多言在安陸今安州雲夢縣東南四里有古城是江夏郡當治安陸水經注云漢高帝六年置

江夏郡治安陸縣

橫尾山在東北古文以為倍尾山

山在今德安府城東北四十里括地志在安陸縣北六  
十里鄭康成曰山若橫尾故名史記作負尾負讀為倍

猶蒼讀為倍也

尚書古文疏證曰陪尾泗水所出當為徐州山徐西境豫東境正相接禹既下

太華於是而熊耳洛所經也而外方伊所經也而桐柏淮所出也至于陪尾泗所出也則諸水之治可見矣若橫尾淮曷為經此又曰陪尾自為北條大河南境山若與內方一列則為南條江漢南境山矣

沙羨

在今武昌府嘉魚縣東北水經注江中有沙陽洲沙陽  
縣治也故沙羨矣晉灼讀羨為夷

蘄春

郟  
今黃州府蘄州後漢書注今蘄州縣也晉灼讀蘄為祈

在今汝甯府信陽州東南八十里蘇林讀郟為盲史記  
魏攻冥阬卽此古字郟冥聲相近故以冥為郟今之平  
靖關是也

雲杜

在今安陸府天門縣西北通典後漢書注太平寰宇記  
並云故城在沔陽縣西北禹貢雲夢土作乂國語楚有  
藪雲連徒州杜卽土亦卽徒也皆字之通耳

下雉

在今武昌府興國州東南一百四十里元和郡縣志故

城在永興縣東南一百四十里如涓音羊氏反

莽曰閏光

水經注作潤光

鍾武

在今信陽州西南通典後漢書注並云故城在鍾山縣  
西南

侯國

宣帝元康元年封長沙頃王子度

錢氏大昕曰王子侯  
表有鍾武侯度此卽  
度所封也志有兩鍾武縣一屬零陵郡一屬江夏郡度  
爲長沙頃王之子其初封必在零陵之鍾武而志以江  
夏之鍾武爲侯國蓋後來徙封如  
春陵侯本在洽道後移於南陽也

莽曰當利

廬江郡故淮南文帝十六年別為國

封淮南厲王子賜後徙衡山

金蘭西北有東陵鄉

舊解以巴邱當東陵為今岳州府地非也江自岳州府下流至九江府過九江始得東陵則不應反在其上此金蘭當在今安慶府境水經注灌水道原廬江金蘭西北東陵鄉大蘇山然則大蘇山即東陵也在今光州固始縣南一百五十里段氏玉裁曰水經注作金蘭縣而志無其名阮氏元曰東陵之大非一二邑所能盡陵乃長山之形今廬州府舒城縣應是東陵之首過此以東為滁州清流關嶺脊最高再東則六合天長以至揚州甘泉江都始為東陵盡處

淮水出

即灌水也

王氏念孫曰淮當為灌即下文灌水北至蓼入決者也全謝山趙東潛並以班志原是淮字淮水即灌水而非出桐柏之淮不知說文云灌水出廬江雩婁北入淮若灌一名淮則是以前入淮矣或又曰廬江郡下有灌水雩婁縣下復有灌水非重出乎曰非也灌水出金蘭西北東陵鄉紀其所出也灌水北至蓼入決紀其所入也松

按王校出上脫所字

屬揚州廬江出陵陽東南北入江

陵陽在今池州府青陽縣南五十里廬江即今之清弋江也水經廬江水出三天子都北過彭澤縣西北入于江蓋即此水而酈道元以長沙國之廬水當之誤矣按海內東經廬江出三天子都入江下釋云彭澤西此彭澤非九江郡彭澤縣也丹陽郡宛陵縣有彭澤聚是此彭澤耳水經衍一縣字而誤以長沙國之廬水當廬江

更以尋陽之廬山當三天子都不知漸江水出三天子都與此同發一地漸江出三天子都在今黟縣廬江出三天子都在今太平縣相去密邇彭澤聚在宛陵西南則爲今甯國縣西境地聚在東江在西則爲清弋江無疑矣惟是清弋江有三原惟中原出太平縣南山卽黟山亦曰黃山爲廬江之正原今日舒溪其東原出旌德縣東鳧山今日梅溪者則卽清水也亦曰涇水西原出石埭縣分水嶺今日陽溪者則又廬江之別原也下流統名之曰清弋江亦曰魯陽江于蕪湖縣南入江古字廬魯聲同故轉廬爲魯與舒亦同又轉爲舒耳後世存清弋之名而無廬江之目遠求之而莫得其實是爲巨

謬矣

戶十二萬四千三百八十三口四十五萬七千三百三十三有樓船官

武帝時楊僕爲樓船將軍擊南越東越故置官於此

縣十二

舒故國

今廬州府舒城縣太平寰宇記今舒城縣也

莽曰昆鄉

居巢

今廬州府巢縣太平寰宇記今巢縣也應邵曰楚人圍巢巢國也史記項羽本紀作鄒晉灼音勦絕之勦淮南

子桀困鳴條敗之焦門注焦或作巢今居巢山在縣南六十里居巢湖在縣西十五里

龍舒

在今廬州府廬江縣西後漢書注故城在廬江縣西太平寰宇記西一百二十里

臨湖

今廬州無為州地

雩婁

在今光州商城縣東南晉地道記縣在安豐縣西南太平寰宇記故城在霍邱縣西南八十里服虔曰楚之東邑也

決水北至蓼入淮

說文解字決水出大別山水經決水出雩婁縣南大別山北過安豐縣東北入于淮山在今霍邱縣西南八十里一名安陽山決水近之不于此出也決水今日史河出商城縣東南牛山東北流逕固始縣東南入淮段氏玉裁曰淮為灌之誤松按段氏說非也淮字不誤若果為灌字豈有甫言決北入灌下又言灌北入決乎又按灌水既言北至蓼則決水不得亦言北至蓼也蓼字疑誤

又有灌水亦北至蓼入決

說文解字灌水出廬江雩婁北入淮水經注決水又西北灌水注之即淮水也東北逕蓼縣故城西而北注決水俗謂之澮水今日石漕河原出大蘇山北流入史河

松按灌水蓋出金蘭鄉至蓼入泱泱又挾以入淮耳

過郡二行五百一十里

過廬江六安二郡也松按二郡宜刪去當作國字

襄安

今無為州地洪氏亮吉日今無為州北境有襄河與全椒縣界則漢襄安之名蓋取襄水安流之義

莽曰廬江亭也

縱陽

在今安慶府桐城縣東南一百里太平寰宇記故城在桐城縣東南二百里武帝作感唐縱陽之歌卽此地也感唐山在桐城縣南五里

尋陽

在今九江府城西十五里元和郡縣志江州縣也州郡

志尋水入江因水以爲縣尋水在今府城西北也閻氏若據

日漢尋陽縣在大江之北今黃州府蘄州東潯水城是東晉成帝咸和中始移于江南今九江府德化縣西十五里是杜佑曰温嶠所移也松按錢氏謂在九江府城西者誤又按廬江郡無江以南地洪氏亮吉立五證以明之錢氏似未知其說

禹貢九江在南皆東合爲大江

九江一盱水二牽水三蜀水四彭水五脩水六廬水七鄱水八餘水九湖漢水也分見豫章郡長沙國下

潯

今六安州霍山縣史記正義在霍山縣東二百步是也



後漢書注以為故城在壽州恐非是應邵晉灼音潛文

穎音岑

松按漢濶縣故城在霍山縣東北三十里見一統志

天柱山在南有祠

山在今安慶府潛山縣西北封禪書武帝登禮濶之天柱山號曰南岳置祠在元封五年也徐靈期南岳記衡山者五岳之南岳也至軒轅乃以濶霍之山為副焉漢武南巡因衡山遼遠道隔江漢于是乃徙南岳之祭于濶山亦承軒轅副義

泚山泚水所出北至壽春入芍陂

水經泚水出濶縣西南霍山東北東北過六縣東北入于淮注泚字或作淖按說文解字作簿然則淖簿之俗

字也今水出霍山縣南潛山縣西北山北流逕霍山縣西北六安州西霍邱縣東合芍陂水芍陂在壽州東南合而入于淮

皖

在今安慶府城北後漢書注故城在懷甯縣通典作皖

音患

有鐵官

湖陵邑

今安慶府太湖縣

北湖在南

今日南泊湖也在今望江縣西四十里合宿松太湖二

縣諸水東入江

松茲

在今霍邱縣東十五里松按在宿松縣北太平寰宇記故城在

霍邱縣東十五里古今地名松茲卽鳩茲地松按錢氏此條全誤

洪氏亮吉有與宿松文學書辨松滋鳩茲正足以箴錢氏

侯國

昭帝始元五年封六安共王子霸

莽曰誦善

九江郡秦置高帝四年更名爲淮南國

王英布漢立之

武帝元狩元年復故

淮南王安國除復故

莽曰延平屬揚州戶十五萬五十二口七十八萬五百二

十五有陂官湖官縣十五

壽春邑

在今鳳陽府壽州西四十里後漢書注今壽州縣閻氏若璩

曰秦漢九江郡皆治壽春邑縣

楚考烈王自陳徙此

考烈王二十二年也史記楚世家楚東徙壽春命曰郢

是

浚道

在今廬州府城東通典故城在慎縣東南後漢書注在

南太平寰宇記南二十五里晉灼讀道爲酋孰

成德

水經肥水出成德縣廣陽鄉北過其縣西北入芍陂又云施水亦從廣陽鄉肥水別東南入湖則縣在今廬州府城西北

莽曰平阿

橐皋

在今廬州府巢縣西北杜預曰在浚道縣東南史記正義故城在巢縣西北五十六里孟康音拓姑松按橐皋即今巢縣之柘皋鎮地蓋橐與拓以音近而通拓與柘又以形近致訛也

陰陵

在今鳳陽府定遠縣西北六十里元和郡縣志故城在定遠縣西北六十五里

莽曰陰陸

通典云王莽改陽陵

歷陽

在今和州西北有歷陽山在西北四十里也後漢書注今和州縣史記正義縣即今州城是也十道志南有歷水故曰歷陽淮南子注湯放桀歷山歷陽之山也

都尉治莽曰明義

當塗

在今鳳陽府懷遠縣東南三里後漢書注故城在鍾離

縣西南元和郡縣志西南一百十七里通鑑地里通釋西九十五里應邵曰禹所娶塗山國也說文解字作媮塗俗字

侯國

武帝征和二年封魏不害

莽曰山聚

鍾離

在今鳳陽府城東六里後漢書注故城在鍾離縣東括地志東北五里太平寰宇記東六里應邵曰古鍾離子國也世本謂之終犁嬴姓楚滅之以為縣史記秦本紀作終黎楚世家楚之邊邑鍾離服虔曰州來西邑

莽曰蠶富

合肥

在今廬州府城北後漢書注故城在廬州北太平寰宇記在今縣北應邵曰夏水出城父東南至此與肥合關駟亦云水經注川殊派別無沿注之理應闕二說非實證也蓋施水合肥耳肥水在今府城南七十里然肥水有二一水北流入淮一水東南流入巢湖此則入巢湖之水也

段氏玉裁曰夏水即夏肥水沛郡城父夏肥水是也

東城

在今定遠縣東南五十里通典故城在鍾離縣東四里後漢書注在定遠縣東南括地志元和郡縣志並云東

南五十里

莽曰武城

博鄉

水經泄水出博安縣北過芍陂西與泚水合西北入淮  
注博安地里志之博鄉縣也泄水上承泚水西北出歷  
濡溪曰濡水逕安豐縣北注于泚謂之濡須口據之應  
在今壽州南也

侯國

元帝竟甯元年封六安繆王子交

莽曰揚陸

曲陽

在今定遠縣西北九十五里後漢書注故城在定遠縣  
西北太平寰宇記定遠縣西北九十五里壽春縣東北  
八十三里西曲陽也應邵曰在淮曲之陽下邳有曲陽  
此加西錢氏大昕曰東海郡曲陽縣注亦引應邵曰在  
淮曲之陽二注當有一誤續漢志以此為西曲  
陽

侯國

元帝河平二年封王根

莽曰延平亭

建陽

在今滁州東四十里

全椒

今滁州全椒縣後漢書注今滁州縣也

阜陵

在今全椒縣東十五里後漢書注故城在全椒縣南太平寰宇記西南八十里

莽曰阜陸

山陽郡故梁景帝中六年別為山陽國

封梁孝王子哀王定

武帝建元五年別為郡

哀王立九年薨亡後國除

莽曰鉅野屬兗州戶十七萬二千八百四十七口八十萬一千二百八十八有鐵官縣二十三

松按張敞傳言山陽郡戶九萬三千口五十萬以上可知宣帝時戶口尚不如元始之盛也

昌邑

在今濟甯州金鄉縣西四十里元和郡縣志故城在金

鄉縣西北四十二里閻氏若璩曰昌邑國即治昌邑縣以昌邑哀王驁傳知之又曰郡亦

治昌邑縣

武帝天漢四年更山陽為昌邑國

封子驁也

有梁邱鄉春秋傳宋齊會于梁邱

在今曹州府城武縣北二十五里括地志故城在城武

縣東北三十二里杜預曰在昌邑西南

南平陽

在今兗州府鄒縣西後漢書注故城今鄒縣史記正義故城在兗州東南六十二里今鄒縣也

莽曰黽平

成武

今城武縣後漢書注今曹州縣也

有楚邱亭

在今曹州府曹縣東南四十里杜預曰在成武縣西南

齊桓公所城遷衛文公于此子成公徙濮陽莽曰成安

湖陵

在今濟甯州魚臺縣東六十里後漢書注故城在方與

縣東南太平寰宇記在魚臺縣東南一里史記項羽本

紀曹參世家並作胡陵湖胡字通用

閻氏若璩曰湖陵故城在魚臺縣東

南六十里沛縣西北五十里交境處余曾親過之問距定陶之荷澤約幾三百里豈知荷澤在定陶東孟豬在

睢陽東北二澤相通距僅一百四十里哉

禹貢浮于泗淮通于荷水在南

舊本荷作河非也說文解字荷澤水在湖陵據此改之

水經泗水南過方與縣荷水從西來注之泗自方與縣

與荷水合荷即濟水之下流也元和郡縣志荷水一名

五丈溝在今魚臺縣北十里蓋改流矣

段氏玉裁曰當作禹貢浮于淮泗通于荷荷水在南志例當云禹貢荷水在南而已而

必舉此七字正以此荷水別于荷澤之荷也應劭注今本亦大譌奪松按錢氏所據蓋說文誤本也此處所在

是禹貢徐州之荷水其在沛陰定陶東者為禹貢豫州之荷澤又按宋傳氏寅曰荷澤水說文云在湖陵班志云在定陶東不同者蓋在定陶者其澤也在湖陵者其

也流

莽曰湖陸

東緡

在今金鄉縣東北二十里後漢書注今金鄉縣也太平寰宇記金鄉本漢東緡縣也

方與

在今魚臺縣北元和郡縣志魚臺縣城即漢方與城也晉灼鄭德音房豫

橐

在今鄒縣西南後漢書注故城在鄒縣西南臣瓚音拓史記及本書表有橐祗侯陳錯後漢書東平憲王傳亦

作橐惟五行志仍作橐按以縣名易高平本以橐高字

聲相近疑表是又州郡志高平前漢名橐王氏念孫曰水經注泗水

篇漢書五行志皆作橐師古於五行志音拓而此志音公老反失之矣松按段校亦以橐為橐之譌

莽曰高平

鉅野

今曹州府鉅野縣高帝紀以酈食其為廣野君韋昭曰在山陽即此野古今字

大野澤在北兗州藪

在今鉅野縣北括地志鉅野縣東北大澤是鄭康成曰在縣北何承天曰鉅野湖澤廣大南通洙泗北接清濟

舊縣故城俱在澤中溝洫志孝武元光中河決洫子東



南注鉅野通于淮泗今日梁山泊也澗為平田矣

單父

在今曹州府單縣南一里後漢書注今宋州縣也孟康音善甫

都尉治莽曰利父

薄

在今衛輝府考城縣東北後漢書注故城在考城縣東北

都關

史記周勃傳云攻都關定陶水經注瓠河北有都關縣故城應在今曹濮之間而無可攷

城都

今曹州府范縣地京相璠曰在東郡廩丘縣南三十里表作成都水經注作邲都

侯國

元帝河平二年封王商

莽曰城穀

黃

水經注有黃水西北通鉅野澤在今金鄉縣界也表屬濟陰

侯國

元帝建昭元年封梁敬王子順

爰戚

今濟甯州嘉祥縣地曹參傳作轅戚

侯國

宣帝地節二年封趙長平

莽曰戚亭

郃成

郃成在今城武縣東南十八里此卽邛成是也表作邛

成說文解字邛地在濟陰邛郃字聲相近而誤墨子堯

葬蛩山之陰蛩亦邛字松按以郃成爲邛成說本宋子京錢氏大昕亦取之

侯國

宣帝元康二年封王奉光爲邛成侯

莽曰告成

中鄉

侯國

元帝建昭元年封梁敬王子延年

平樂

在今城武縣東水經注黃溝東逕城武縣故城南又東

逕郃城北又東逕平樂縣故城南

侯國

元帝建昭元年封梁敬王子遷

泡水東北至沛入泗

說文解字泡水出平樂東北入泗水經注泡水卽豐水

之上原也今泡水在沛縣西入泗松按今志泡作包沛作沛錢據趙校水經注改段氏玉裁曰今泡河自今山東單縣流逕江蘇豐縣北又東逕沛縣界循城東南至泗亭驛而合於泗

鄭

今沂州府費縣西南七十里有鄭城遠疑非是

侯國

元帝建昭元年封梁敬王子罷軍

瑕邱

在今兗州府城西二十五里太平寰宇記兗州瑕邱縣也春秋傳負瑕卽此

留鄉

表屬濟陰

侯國

元帝建昭元年封梁敬王子就

栗鄉

侯國

成帝鴻嘉元年封東平思王子護

莽曰足亭

曲鄉

表屬濟陰

侯國

成帝永始三年封梁荒王子鳳

西陽

表屬東萊萊字誤當為平封東平子不在東萊也

侯國

成帝元延二年封東平思王子並

濟陰郡故梁景帝中六年別為濟陰國

封梁孝王子不識也水經注漢景帝以濟水出其北東

注于定陶置濟陰國指北濟而定名也

宣帝甘露二年更名定陶

封子囂也後徙楚為楚孝王

禹貢荷澤在定陶東

在今曹州府城東南三十里括地志荷澤在濟陰縣東

北九十里定陶城東今名龍池亦名九卿陂水經注濟

水又東北荷水出焉水上承濟水于濟陽縣東又東逕

陶邱北尚書所謂道荷水自陶邱北是也

屬兗州戶二十九萬二千五百三十八萬六千二百七

十八縣九

定陶

在今曹州府定陶縣西南史記正義今曹州城也元和

郡縣志故城在濟陰縣東北四十七里閻氏若璩曰濟陰郡治定陶縣

故曹國周武王弟叔振鐸所封禹貢陶邱在西南

在今定陶縣西南七里皇甫謐以為是舜陶河濱之處

也王氏念孫曰定陶故城在縣西北四里松按陶邱有堯城堯嘗居之故成陽有冢

陶邱亭在南

志卷第六  
舊本無在南二字從水經注加松按王校同

宛句

在今曹州府城西南元和郡縣志故城在今縣西北四十里盧綰傳作宛句史記表作宛胸水經注作宛胸

莽改定陶曰濟平

改郡名濟平也後漢書耿純傳純父艾為莽濟平大尹

宛句曰濟平亭

呂都

在今曹州府城西南三十里

莽曰祈都

葭密

在今曹州府曹縣西北三十里太平寰宇記故城在乘氏縣即魯元公所取者

成陽

在今曹州府濮州東南一百里後漢書注故城在雷澤縣東括地志雷澤縣本漢成陽在濮州東南九十一里有堯冢

在今濮州東南七十里括地志元和郡縣志並云陵在雷澤縣西三里呂氏春秋堯葬穀林皇甫謐曰穀林即成陽墨子堯葬蛭山之陰蛭穀亦聲相近也檀弓齊穀王姬之喪鄭康成曰穀當為告是古字蛭既與穀通而穀又與告通郟即從告此郟郟互通之由益信郟成之

卽爲邛成無疑矣劉向日堯葬濟陰邱隴山皇覽堯冢在濟陰成陽晉書地理志在成陽西水經注堯葬成陽西北

靈臺

後漢堯母碑文云堯母慶都感赤龍而生堯遂以侯伯恢踐帝下有闕文慶都仙歿蓋葬于茲欲人莫知名曰靈臺

上立黃屋堯所奉祠據之則靈臺堯母冢也碑建甯五年造水經注堯陵南一里有堯母慶都陵稱曰靈臺松按

孟郁修堯廟碑云帝堯陵在成陽又云列種柏樹吏卒養護南通靈臺東注城域

禹貢雷澤在西北

在今曹州府城東北六十里括地志在雷澤縣郭外西

北元和郡縣志在縣北郭外鄭康成曰雷夏兖州澤雍水沮水相觸而合入此澤中山海經雷澤有雷神龍首人頰鼓其腹則雷

鄆成

在今濮州東二十里史記正義今鄆城縣也史記或作鄆或作甄又或云齊或云衛一地耳

莽曰鄆良

句陽

在今曹州府城北二十里通典後漢書注並云故城在乘氏縣北太平寰宇記縣北三十五里

稅

在今曹州府成武縣西北二十九里元和郡縣志故城在成武縣西北二十九里說文解字作庇孟康讀稭為妒

莽曰萬歲

乘氏

在今曹州府鉅野縣西南五十里按今又有乘氏故城在曹縣北者後魏縣也非此

泗水東南至睢陵入淮

水經濟水東至乘氏縣西分為二其一水東南流者過乘氏縣南昌邑縣北金鄉縣南東緡縣北又東過方與縣北為荷水荷水東過湖陸縣南東入于泗水又東南

過沛縣東北留縣北彭城縣北徐縣北至睢陵縣南入

于淮是此泗即荷荷即濟也松按閻氏若璩以班志乘氏與卞兩載泗水為非云

班固祇當於卞縣下注云禹貢泗水出陪尾山西南至方與與荷合又東南至睢陵入淮只此已足又云睢陵仍當作淮陰泗入淮在今清河縣東南謂之泗口亦名清口睢陵則今睢甯縣治耳

過郡六行千一百一十里

過濟陰山陽沛楚東海臨淮六郡也

沛郡

說文解字作邳正字沛借字

故秦泗水郡

高帝本紀作泗川始皇二十三年置

高帝更名

四年更名也

莽曰吾符屬豫州戶四十萬九千七十九口二百三萬四百八十縣三十七

相

在今鳳陽府宿州西北九十里後漢書注故城在符離縣西北元和郡縣志縣西北九十里應邵曰縣以水名水經注相亦睢水之別名也

閻氏若璩曰沛郡治相以薛廣德傳知之

莽曰吾符亭

龍亢

在今鳳陽府懷遠縣西北八十五里太平寰宇記故城在蕪縣南十八里晉灼讀亢爲岡

竹

在今宿州北二十五里後漢書注故城今符離縣也李奇曰今竹邑

莽曰篤亭

穀陽

在今宿州東南太平寰宇記故城在蕪縣東七十里應邵曰在穀水之陽水經注謂之解水今日澠河也自宿州南東流爲長湖合澮河入于淮

蕭

今徐州府蕭縣後漢書注今徐州縣也北征記城周十四里南臨汴水



故蕭叔國宋別封附庸也

向

在今懷遠縣西北杜預曰向城在龍亢東南

故國春秋曰莒人入向姜姓炎帝後

銓

在今宿州西南九十里後漢書注故城今臨渙縣也史

記秦本紀作銓徐廣曰一作銓

廣戚

在今徐州府沛縣東通典徐州沛縣卽廣戚故城後漢

書注在沛縣東

侯國

成帝河平三年封楚孝王子勲

莽曰力聚

下蔡

在今鳳陽府壽州北三十里太平寰宇記壽州縣也

故州來國爲楚所滅後吳取之至夫差遷昭侯于此後四

世侯齊竟爲楚所滅

楚惠王滅之

松按夫差遷昭侯何氏焯曰昭侯上脫蔡字

豐

今徐州府豐縣後漢書注今徐州縣也水經注泡水逕

豐西澤謂之豐水

莽曰吾豐

鄆

在今歸德府鹿邑縣西南七十五里太平寰宇記鹿邑

縣漢鄆縣地也孟康如涪闕駟音多蘇林音多寒反

段氏王裁曰鄆之音多其音古矣史記周繆傳史漢二侯表

水經注音皆同松按全氏經史問答據漢書周繆傳引

蘇林鄆多寒翻以駁之非也毛本無

譙

今潁州府亳州後漢書注今亳州縣也春秋傳曰焦

莽曰延成亭

蕪

在今宿州南四十六里蘇林音機

松按蕪有大澤鄉即陳涉所起也

垂鄉高祖破鯨布

在今宿州西南高帝本紀上破布軍會缶史記作會甄

孟康曰會缶音儉保蘇林曰缶音垂按垂作甄古字通

也作缶形近誤也因誤而強爲之音是未能貫穿攷證

矣晉灼曰垂蕪縣鄉徐廣曰在西

都尉治莽曰蕪城

埶

在今蕭縣西水經注獲水逕碭縣故城北又逕杼秋縣

南東歷洪溝即埶縣也杜預曰蕭縣西有紅亭孔光傳

作虹郡國志作紅埶虹古今字紅通用字

莽曰貢

輒與

莽曰華樂

山桑

在今潁州府蒙城縣北三十七里後漢書注今亳州縣也六國時鬻桑即此十三州志山生于邑其亭有桑因以氏縣

公邱

在今兗州府滕縣西南十五里史記正義元和郡縣志並云在滕縣西南十五里

侯國

武帝元朔三年封魯恭王子順

故滕國周懿王子錯叔繡所封

今滕縣城滕國城也宋忠曰滕國沛國公邱是叔繡文

王子懿字誤

王氏念孫曰景祐本叔繡下有文公二字水經泗水注引地理志與景祐本同

三十一世為齊所滅

符離

在今宿州東北後漢書注故城在符離縣東按今宿州北二十五里符離故縣漢竹邑縣也此在竹邑之東史記路博德封符離侯本書表作邳離

莽曰符合

敬邱

在今歸德府永城縣西北三十里保安鄉是後漢書注

故城在永城縣西北太平寰宇記在鄴縣東北七十里  
應邵曰春秋遇于大邱明帝更名太邱者也

侯國

武帝元朔三年封魯恭王子政錢氏大昕曰魯恭王子政封瑕邱侯疑卽此敬

邱山陽郡有瑕邱縣然不云侯國

夏邱

今泗州州先歿于湖寄治盱眙近乃以故虹縣改之通  
典後漢書注並云故城卽虹縣城是

莽曰歸思

浚

在今鳳陽府靈璧縣南後漢書注故城在虹縣西南太

平寰宇記西南七十八里應邵音絞經之絞水經注浚  
水首受蘄水亂流入淮

侯國

武帝征和元年封趙敬肅王子周舍凡封趙王子皆分  
趙地齊王子皆分齊地一例也間有別封者則此類是  
或以周舍所封爲在常山石邑浚水余考之矣非也

垓下聚高祖破項羽

在今靈璧縣西五十里張揖曰垓地名應邵讀垓爲該

松按垓下錢校補聚字王校同又按王氏念孫言垓下聚在靈璧縣東南

莽曰肴成

舊本作有成或作育成從水經注改肴浚聲相近

松按王校

同

沛

在今沛縣東南微山下後漢書注今徐州縣也元和郡

縣志今縣理城漢沛縣城也水經注昔許由隱于沛澤

縣取澤為名縣治故城南垞上東岸有泗水亭閻氏若

泗水郡治沛縣漢

有鐵官

五行志沛郡鐵官鑄鐵不下即此是也

芒

在今永城縣東北甫城鄉是後漢書注太平寰宇記並

云故城在永城縣北一名臨睢城應邵曰芒世祖更名

臨睢蘇林音忙遽之忙

莽曰博治

水經注作傳治

建成

在今永城縣西後漢書注故城在鄆縣西北

侯國

宣帝五鳳三年封黃霸

城父

在今亳州東南七十里括地志今亳州所理縣也史記

表有故城侯尹恢故城即城父也春秋傳曰夷

夏肥水東南至下蔡入淮

水經注夏肥水上承沙水逕城父縣故城南東為高陂又東為大灤陂會雞水東注于淮雞水今日雒河也入渦水雒河上原曰澮河澮河即夏肥水之舊改矣

過郡二行六百二十里

過沛臨淮二郡

莽曰思善

建平

在今永城縣西通典太平寰宇記並云故城在鄗縣西南後漢書注在鄗縣西北一名馬頭城

侯國

昭帝元鳳元年封杜延年

莽曰田平

鄗

在今永城縣西南後漢書注今亳州縣也說文解字作鄗應邵曰音嗟孫檢曰有二縣字音多亂其屬沛郡者音嗟屬南陽者音讚班固泗水亭碑以此為蕭何所封又江統徂淮賦云戾鄗城而倚軒實蕭公之封國

莽曰贊治

古鄗鄗字聲相轉亦如單多同也莽以鄗為贊治是當時鄗已有贊音

栗

在今亳州東北水經注睢水東逕穀孰縣故城北又東

逕栗縣故城北又東逕太邱縣故城北

侯國

武帝征和元年封趙敬肅王子樂

莽曰成富

扶陽

在今蕭縣西南六十五里通典故城在蕭縣東北元和

郡縣志在城父縣東北三十六里太平寰宇記在蕭縣

西南六十五里

侯國

宣帝本始二年封韋賢

莽曰合治

高

侯國

元帝建昭元年封梁敬王子舜

高柴

侯國

元帝建昭元年封梁敬王子發

漂陽

如淳音栗本或作漂云音粟

平阿

在今懷遠縣西水經注淮之西有平阿城

侯國

成帝河平二年封王譚

莽曰平甯

東鄉

臨都

義成

在今懷遠縣東北十五里京相璠曰楚東地也沙水于此入淮春秋傳謂之沙汭

祁鄉

在今歸德府夏邑縣東北五十里郡國志穀孰有祁亭括地志在下邑縣東北四十九里

侯國

成帝永始二年封梁夷王子賢

莽曰會穀



新斟注地里志卷第六終

新斟注

上

